

**ՀԱՅԱՍՏԱՆԻ ՀԱՆՐԱՊԵՏՈՒԹՅԱՆ ԳՆՈՒՄՆԵՐԻ ՀԵՏ ԿԱՊՎԱԾ
ԲՈՂՈՔՆԵՐ ՔՆՆՈՂ ԱՆՁ**

ՀԱՅՏԱՐԱՐՈՒԹՅՈՒՆ

**ՆԱԽԿԻՆՈՒՄ ՆԵՐԿԱՅԱՑՎԱԾ ԹԻՎ ԳԲՔԱ-ՆԳ-2019/73 ԾԱԾԿԱԳՐՈՎ ԲՈՂՈՔԸ
ՎԱՐՈՒՅԹ ԸՆԴՈՒՆԵԼՈՒ, ՆՈՐ ԾԱԾԿԱԳԻՐ ՏԱԼՈՒ ԵՎ ԳՈՐԾԻ ՔՆՆՈՒԹՅՈՒՆԸ
ՍԿՋԲԻՑ ՍԿՍԵԼՈՒ ՄԱՍԻՆ**

Բողոքի ծածկագիրը և ամսաթիվը՝ ԳԲՔԱ-ԼՕ-2019/80, 01.10.2019թ.

Բողոք բերող անձ՝ «Գավառտրանս» ՍՊԸ

Պատվիրատու՝ Երևանի քաղաքապետարան

Գնման ընթացակարգի ծածկագիրը՝ «ԵԲ-ԲՄԱՊՁԲ-19/19» բաց մրցույթ

Գնման առարկան՝ Երևանի քաղաքապետարանի կարիքների համար կենցաղային թափոնների, կոնտեյներների ձեռքբերում:

Բողոքի պահանջը՝ Պարտավորեցնել «ԵԲ-ԲՄԱՊՁԲ-19/19» ծածկագրով ընթացակարգի գնահատող հանձնաժողովին և պատվիրատուին անվավեր ճանաչելու գնահատող հանձնաժողովի կողմից 2019 թվականի հոկտեմբերի 1-ին հաստատված պայմանագիր կնքելու մասին որոշումը և հանձնաժողովի 25.09.2019թ. 3-րդ արձանագրության 3.3 և 4.1 կետերով կայացրած որոշումներն ու «ԷՍԷ ԳմբՀ» (ESE GmbH) և «ԳԱՎԱՌՏՐԱՆՍ» ՍՊԸ կոնսորցիումը հայտը գնահատել բավարար՝ ճանաչելով առաջին տեղն զբաղեցրած մասնակից:

ԳՆՈՒՄՆԵՐԻ ՀԵՏ ԿԱՊՎԱԾ ԲՈՂՈՔՆԵՐ ՔՆՆՈՂ ԱՆՁ՝ Լ. ՕՀԱՆՅԱՆ

ՔԱՐՏՈՒՂԱՐ՝ Ռ.ՄԿՐՏՉՅԱՆ

Նիստերին կարելի է առցանց հետևել <https://www.e-gov.am/gnumner/> հղումով.

Տեղեկացնում ենք, որ «Գնումների մասին» ՀՀ օրենքի՝

- 50-րդ հոդվածի 10-րդ մասի համաձայն՝ յուրաքանչյուր անձ, որի շահերը խախտվել են կամ կարող են խախտվել բողոքարկման հիմք ծառայած գործողությունների արդյունքում, իրավունք ունի մասնակցելու բողոքարկման ընթացակարգին՝ մինչև բողոքի վերաբերյալ որոշում ընդունելու ժամկետը գնումների հետ կապված բողոքներ քննող անձին ներկայացնելով համանման բողոք: Նույն հոդվածի համաձայն՝ բողոքարկման ընթացակարգին չմասնակցած անձը զրկվում է գնումների հետ կապված բողոքներ քննող անձին համանման բողոք ներկայացնելու իրավունքից,
- 51-րդ հոդվածի 1-ին մասի համաձայն՝ գնումների հետ կապված բողոքներ քննող անձին ներկայացված բողոքն ինքնաբերաբար կասեցնում է գնման գործընթացը՝ նույն օրենքի 50-րդ հոդվածի 9-րդ մասով նախատեսված հայտարարությունը հրապարակվելու օրվանից մինչև բողոքարկման վերաբերյալ ընդունված որոշման՝ տեղեկագրում հրապարակման օրը ներառյալ:

Գնումների հետ կապված բողոքներ քննող անձին
(հասցե՝ ք. Երևան, Մելիք-Ադամյան փ. 1)

Բողոք ներկայացնող անձ՝
«ԳԱՎԱՌՏՐԱՆՍ» ՍՊԸ-ի տնօրեն Հրայր Գուլարյան
(հասցե՝ 1201, ք. Գավառ, Սայադյան 2,
ՀՎՀՀ՝ 08413852, «Ամերիաբանկ» ՓԲԸ, հ/հ 1570024528430200)
gavartrains@mail.ru 077 - 457 - 933

Պատվիրատու՝ Երևանի քաղաքապետարան
(հասցե՝ ք. Երևան, Արգիշտի փող. 1)

Գնման ընթացակարգի ծածկագիրը և առարկան՝
ԵԲ-ԲՄԱՊՁԲ-19/19,
Երևանի քաղաքապետարանի կարիքների համար կենցաղային
թափոնների կոնտեյներների ձեռքբերում

Երևանի քաղաքապետարանը (այսուհետ՝ Պատվիրատու) Երևանի քաղաքապետարանի կարիքների համար կենցաղային թափոնների կոնտեյներների ձեռքբերման նպատակով ս. թ. օգոստոսի 1-ին կազմակերպել է ԵԲ-ԲՄԱՊՁԲ-19/19 ծածկագրով բաց մրցույթ: Ընթացակարգին մասնակցել է նաև մեր կազմակերպությունը՝ «ԷՍԷ ԳմբՀ» (ESE GmbH) և «Գավառտրանս» ՍՊԸ կոնսորցիումի միջոցով: Հրավերի առաջին մասի 7-րդ կետի համաձայն՝ հայտի ապահովումը ներկայացվում է բանկային երաշխիքի կամ կանխիկ փողի ձևով, որի չափը հավասար է մասնակցի գնային առաջարկի հինգ տոկոսին: Տեղեկացնում ենք, որ մեր կողմից, որպես հայտի ապահովում հրավերում նշված գանձապետարանի հաշվին մուտք է եղել կանխիկ փող 24.09.2019թ. օրվա դրությամբ 9300000 (ինը միլիոն երեք հարյուր հազար) ՀՀ դրամ: 25.09.2019թ գնահատող հանձնաժողովը որոշում է կայացրել մերժելու «Գավառտրանս» ՍՊԸ-ի հայտը, քանի որ մասնակիցը չի կցել հայտի ապահովումը պատճառաբանությամբ՝ հիմք ընդունելով հրավերի 7.1 կետը: Խնդրում են նկատեք, որ մենք մրցույթին մասնակցել ենք ԷՍԷ ԳմբՀ» (ESE GmbH) և «Գավառտրանս» ՍՊԸ կոնսորցիումի միջոցով, մեր գնային առաջարկը նվազագույնն է և երկրորդ տեղն զբաղեցրած մասնակցի գնային առաջարկի համեմատ տնտեսվում է շուրջ 1 մլն դրամ: Գտնում ենք, որ ընթացակարգի հանձնաժողովը ոչ իրավաչափ է մերժել մեր հայտը հետևյալ հիմնավորումներով:

ՀՀ քաղաքացիական օրենսգրքի՝ պարտավորությունների կատարման ապահովման եղանակները սահմանող 368-րդ հոդվածի 1-ին մասի համաձայն՝ պարտավորությունների կատարումը կարող է ապահովվել գրավով (գլուխ 15), տուժանքով, պարտապանի գույքի պահումով, երաշխավորությամբ, երաշխիքով, նախավճարով և օրենքով կամ պայմանագրով նախատեսված այլ եղանակներով:



«Գնումների մասին» ՀՀ օրենքի (այսուհետև՝ Օրենք) 2-րդ հոդվածի 1-ին մասի 9-րդ կետի համաձայն՝ հայտի ապահովումը նույն օրենքով նախատեսված դեպքերում մասնակցի կողմից հայտով ստանձնած պարտավորությունների կատարման ապահովող միջոցն է: Օրենքի 32-րդ հոդվածի 1-ին մասի համաձայն՝ մասնակիցը հայտով՝ հրավերով սահմանված պահանջով ներկայացնում է հայտի ապահովում, որի չափը հավասար է հայտով առաջարկվող գնի մինչև հինգ տոկոսին: Հայտի ապահովումը ներկայացվում է միակողմանի հաստատված հայտարարության՝ տուժանքի կամ բանկային երաշխիքի կամ կանխիկ փողի ձևով: Կանխիկ փողի ձևով ներկայացված հայտի ապահովումը պահվում է լիազոր մարմնի անվամբ բացված գանձապետական հաշվում:

ՀՀ քաղաքացիական օրենսգրքի 142-րդ հոդվածի համաձայն՝ Հայաստանի Հանրապետությունում դրամական միավորը Հայաստանի Հանրապետության դրամն է:

ՀՀ կառավարության 2017թ. մայիսի 4-ի N 526-Ն որոշմամբ հաստատված «Գնումների գործընթացի կազմակերպման» կարգի (այսուհետև՝ Կարգ) 32-րդ կետի 1-ին ենթակետի դ. պարբերության համաձայն՝ հրավերով նախատեսվում է նաև, որ մասնակիցը հայտով ներկայացնում է հրավերով նախատեսված դեպքերում հայտի ապահովում: Եթե հայտի ապահովումը ներկայացվում է բանկային երաշխիքի ձևով, ապա գնման ընթացակարգն էլեկտրոնային եղանակով կազմակերպված լինելու դեպքում ներկայացվում է երաշխիքի բնօրինակից արտատպված (սկանավորված) տարբերակը՝ պայմանով, որ, եթե մասնակիցը ճանաչվում է առաջին տեղը զբաղեցրած, ապա սույն կարգի 43-րդ կետի 4-րդ ենթակետով սահմանված կարգով և ժամկետում ներկայացնում է դրա բնօրինակը:

Ի մի բերելով վերոգրյալը, արձանագրվում է կանխիկ փողով հայտի ապահովմանը ներկայացվող օրենսդրական կարգավորման հետևյալ իրավիճակը.

- ՀՀ քաղաքացիական օրենսգրքի 24-րդ գլխով սահմանված են պարտավորությունների կատարման ապահովման եղանակները, այդ թվում տուժանքը և բանկային երաշխիքը,
- ՀՀ քաղաքացիական օրենսգրքի 368-րդ հոդվածը նախատեսում է պարտավորության կատարման ապահովման այլ եղանակ օրենքով սահմանելու հնարավորություն,
- Օրենքով նախատեսվել է պարտավորության կատարման ապահովման այլ եղանակ՝ կանխիկ փող,
- Կանխիկ փողն ակնհայտորեն էապես տարբերվում է տուժանքից և բանկային երաշխիքից իր տեսակով, որոնք հանդիսանում են միակողմանի գործարք փաստաթղթային տեսքով (տե՛ս օրենսգրքի 369, 370, 383),
- Կարգով սահմանված է հայտի ապահովումը բանկային երաշխիքով ներկայացնելու դեպքում դրանից արտատպված (սկանավորված) տարբերակը հայտով ներկայացնելու պահանջ,

- Կարգով կանխիկ փողի տեսքով հայտի ապահովում ներկայացնելու դեպքում վճարման անդորրագրի ներկայացման պահանջ սահմանված չէ:

Հիմք ընդունելով վերոգրյալ իրավանորմերում առկա կարգավորումները՝ եզրահանգում ենք, որ ապահովումը կանխիկ գումարի տեսքով ներկայացնելը տարբերվում է պարտավորության ապահովման այլ տեսակներից իր բնույթով, այդ իսկ պատճառով օրենսդիրը չի սահմանել կանխիկ գումարի տեսքով հայտի ապահովում տրամադրելիս այլ փաստաթուղթ ներկայացնելու պարտավորություն:

Բացի վերոգրյալը, անհրաժեշտ ենք համարում նշել, որ ԵԲ-ԲՄԱՊՁԲ-19/19 ծածկագրով բաց մրցույթի գնահատող հանձնաժողովը 3-րդ արձանագրության 3.3-րդ կետում նշել է, որ Մեր կազմակերպության հայտը չի համապատասխանում նույն ընթացակարգի հրավերի 7.1-րդ կետով սահմանված պահանջներին, որը սահմանում է՝

«7"1" Մասնակիցը հայտով՝ սույն հրավերով սահմանված կարգով ներկայացնում է հայտի ապահովում:

Հայտի ապահովումը ներկայացվում է բանկային երաշխիքի կամ կանխիկ փողի ձևով, որի չափը հավասար է մասնակցի գնային առաջարկի հինգ տոկոսին: Ընդ որում, եթե մասնակիցը հայտի ապահովումը ներկայացրել է սույն կետով սահմանված չափից ավելի, ապա հայտը համարվում է հրավերի պահանջներին բավարարող և ենթակա չէ մերժման:

Կանխիկ փողի ձևով ներկայացված հայտի ապահովումը պետք է փոխանցվի Կենտրոնական գանձապետարանում լիազորված մարմնի անվամբ բացված «900008000466» գանձապետական հաշվին, որը ենթակա է վերադարձման այն ներկայացրած մասնակցին՝ սույն ընթացակարգի շրջանակում պայմանագիրը կնքվելուց կամ սույն ընթացակարգը չկայացած հայտարարվելուց հետո քսան աշխատանքային օրվա ընթացքում, բացառությամբ սույն հրավերի 1-ին մասի 7.3 կետով նախատեսված դեպքերի:» ինչը չի համապատասխանում իրականությանը, քանի որ մեր կազմակերպության կողմից ընթացակարգի հրավերով սահմանված կարգով համապատասխան գանձապետական հաշվին է փոխանցվել 9300000 (ինը միլիոն երեք հարյուր հազար) ՀՀ դրամ: Ուստի, կարելի է փաստել, որ ընթացակարգի հրավերի 7.1-րդ կետով սահմանված որևէ պահանջ մեր կազմակերպության կողմից չի խախտվել և իրավաչափ չէ նման հիմնավորմամբ մեր կազմակերպության կողմից ներկայացված հայտի մերժումը:

Հայտերի բացման նույն օրը գրությամբ դիմել ենք Պատվիրատուին և գնահատող հանձնաժողովին բացատրելով իրավիճակը, սակայն մինչ օրս որևէ պատասխան չենք ստացել:

Հաշվի առնելով վերոգրյալը, ինչպես նաև այն, որ հայտի ապահովում է հանդիսանում կանխիկ փողի ձևով Կենտրոնական գանձապետարանում լիազորված մարմնի անվամբ բացված «900008000466» գանձապետական հաշվին փոխանցված 9000000 դրամ գումարը, այլ ոչ թե փոխանցումը հավաստող փաստաթուղթը և հիմք ընդունելով Օրենքի 34-րդ հոդվածի 1-ին և 2-րդ մասերը, 50-րդ հոդվածի 7-րդ մասը խնդրում եմ ԵԲ-ԲՄԱՊՁԲ-19/19 ծածկագրով ընթացակարգի

գնահատող հանձնաժողովին և Պատվիրատուին պարտավորեցնել անվավեր ճանաչելու գնահատող հանձնաժողովի կողմից 2019 թվականի հոկտեմբերի 1-ին հաստատված պայմանագիր կնքելու մասին որոշումը և հանձնաժողովի 25.09.2019թ.-ի 3-րդ արձանագրության 3.3 և 4.1 կետերով կայացրած որոշումներն ու «ԷՍԷ ԳմբՀ» (ESE GmbH) և «Գավառտրանս» ՍՊԸ կոնսորցիումի հայտը գնահատել բավարար՝ ճանաչելով առաջին տեղն զբաղեցրած մասնակից:

Կից ներկայացնում եմ՝

- հայտի ապահովումը կատարված լինելու հավաստումը,
- բողոքարկման վճարի անդորրագրի պատճենը,
- մեր գրության պատճենը ուղղված Պատվիրատուին և գնահատող հանձնաժողովին,
- ԵԲ-ԲՄԱՊՁԲ-19/19 ծածկագրով բաց մրցույթի ընթացակարգի հայտարարությունը,
- ԵԲ-ԲՄԱՊՁԲ-19/19 ծածկագրով բաց մրցույթի ընթացակարգի գնահատող հանձնաժողովի նիստերի N 3 արձանագրության պատճենը,
- ԵԲ-ԲՄԱՊՁԲ-19/19 ծածկագրով բաց մրցույթի ընթացակարգի գնահատող հանձնաժողովի պայմանագիր կնքելու մասին որոշման պատճենը,
- Անձր հաստատող փաստաթղթի պատճենը:

Առդիր՝ 12 թերթ:



Հ. Գուլարյան